

# STELLINGWARVER GEDICHIES OVER DIEREN

*Geschikt veur leerlingen van groep 7 en 8*

- 01. Meensken kieken
- 02. Vremde voegel
- 03. Vliege
- 04. Spraakverwarring
- 05. Moonster
- 06. Vlooien
- 07. Woef...!
- 08. Piepmoes
- 09. An de baos van Robbie
- 10. Kiendergebed
- 11. Wilde gaanzen
- 12. Stiekelvarkentien

- over aepen en meensken
- over een voegel
- over een vliege
- over honnen
- over een voegel
- over vlooien
- over een hond
- over een moes
- over een hond
- over een hond
- over gaanzen
- over een stiekelvarkentien



*Bijheurend verwarkingsmateriaol is te vienen onder:*

*Stellingwarver gedichies over dieren, verwarkingsmateriaol*

## Meensken kieken

In een grote dieretuun  
in een kouwe an de buterkaant  
daor zit een hiel klein aepien  
kiek, daor an de linkerkaant

Zien moeke had an him verteld  
dat de meens slim geveerlik was  
mar hier kon 't gien kwaod

ze leupen allemaol aachter glas

Et aepien kikt de hiele dag naor meensken  
wit en zwat en klein en groot  
die hieltied gekke bekken trekken  
en hi'j lacht him bi'jkaans dood

*Jan Veldhuizen*

## Vremde voegel

Een oolde voegel op een takke  
zwatwit pak, heer van staand  
een goolden brille op 'e neuze  
in de snaevel een goolden taand

Vroeger, zee de voegel,  
wa'k een hiel beroemde vent  
ie weten wel, zoe'n iene  
die alleman bi'j naeme kent

In bekende grote zaelen  
daor maekte ik meziek  
op een grote kontrabas  
veur een enorm peblik

Mar ja, dan woj' oolder  
en now is et dan zo ver  
dat gien meenske mi'j nog kent  
ik bin now gewoon een oolde ex-ster

*Jan Veldhuizen*



## Vliege

Een grote, dikke vliege is  
echt waar, 't is ongeleugen  
op een mooie zoemerdag  
van Amsterdam naar Buil toe vleugen

Mar de schrik sleug him om 't hatte  
hi'j raekte hielemaol van streek  
doe hi'j vanuut de hoogte  
op et dörpien daelekeek

Hi'j docht, dit gaot verschrikkelijk mis  
et bliekt dat hier gien vliegveld is

*Jan Veldhuizen*

## Spraakverwarring

Een grote Duutse hedder  
de hiemhond van Garriet-Jan en Griet  
had een groot perbleem  
hi'j verston de buurhond niet

Hi'j perbeerde et in Duuts en Hollaans  
mar hi'j kreeg mar gien respoons  
op ich en ikke, schön en mooi  
hi'j vun 't aenlik mar bar hoons

Gutenmorgen en lekker eten,  
gromde hi'j zien buurman toe  
die haelde doe de schoolders op  
en zee gien bah of boe

De hedder wodde kwaod en blafte,  
ie bin een stom stok vee  
doe blafte et ere hontien,  
je parle français, je suis un bouvier

*Jan Veldhuizen*



## Vlooien

Twie dikke vlooien wipten  
tegere haand in haand  
op een mooie zoemerdag  
deur et waarme zaand

Hee, vreug doe een krobbegien,  
moej'm niet an 't wark  
vandaege niet, zee doe de iene,  
wi'j gaon now naor de vlooemark

*Jan Veldhuizen*

## Moonster

Een voegel op een dikke toeke  
keek loerend deur et brilleglas  
foeterend op alles en iederiene  
omdat hi'j deksels duvels was

D'r wodt wat ofteut hier in de bos  
d'r gaon praoties over mi'j en da's min  
omda'k hieltied koek-koek roep  
zeggen ze da'k et koekiesmoonster bin

Ik hebbe d'r hatstikke genoeg van  
'k zol votgaon a'k zeker wust  
dat mien kiend goed verzorgd wodt  
daorginder in dat liesternust

*Jan Veldhuizen*



## Piepmoes

Ik snuffel en ik snoeve,  
ik bin een stoere moes.  
Ik hole niet van katten,  
ik bin niet veur de poes.

De katten bin mien burenen,  
die spoeken vaeke om huus.  
Dan daenk ik: grote kringen,  
oe bleven jim mar thuus!

Laest zollen ze deur de schostien,  
dat vul heur lang niet mit.  
Klaos Kaeter kreeg zien stat doe  
op 't hiete kachellit!

Klaos tjoeppe naor beneden,  
kwam daele mit een boem!  
Ik zag dat krek gebeuren,  
ik lachte mi'j haost kroem.

Ik zat daor mar te gniesen,  
en zee: 'Hoe vuult dat, maot?'  
Klaos klauwde mit zien naegels,  
hi'j wodde ofgrieslik kwaod.

Zeg beste kammeraoden,  
ik moet d'r gauw vandeur!  
Want daor komt Klaos de kaeter,  
Die is nog raozend, heur!

Al bin 'k de sterkste piepmoes,  
van 't hiele heer en veer,  
Die klaos is zo gremietig,  
die stao ik now niet meer!

Piepmoes, Piepmoes,  
ie bin mien kammeraod,  
Piepmoes, Piepmoes,  
ie bin mien beste maot.

*Henk Bloemhoff*

## Woef...!

Beste meensken, hier bi'j omme  
wi'j' es lezen, wat a'k schrief?  
'k Bin een hond uut et asiel,  
Soms vervelend, meerstal lief!  
'n Posien leden kwam ik bi'j jim,  
uut de stad naor Stellingwarf.  
Bi'j een baos mit boerderi'je.  
mit een machtig mooi groot arf!  
'k Speul hier vaeke in et kaampien.  
'k diedel omme in de tuun!  
En ik heur soms iens de baos niet  
as ik in de wal omm'struun!  
Bliede bin 'k, dat kuj' begriepen  
'k heb 't meraokel naor mien zin.  
Mar dát is niet waor 'k om schrieve...  
dát hoeft niet de wereld in!  
Nee, ik wol jim hier wat vraogen.  
Op et plak, waor ik eerst was,  
zitten nog zoe'n veertig maoten  
mit pepier, én zonder ras!  
Wi'j' een hontien hebben, meensken.  
daenk dan evenpies an heur!  
Daenk dan even an mien vrunden!  
daor bin wi'j slim daankber veur

*Kellie  
(Henk Bloemhoff)*

## An de baos van Robbie

Vremde baos, ik heb een hontien,  
dat hiet Robbie neffens mi'j.  
't Ston temeensen in zien halsbaand.  
naor die naeme luustert hi'j.

'k Vun him zomar van-de-zoemer  
bi'j oons achter in de bos.  
Vaastebunnen an een polle,  
'k maekte rap zien ketten los.

Haj' doe iens gien medelieden,  
wol ie Robbie zo gauw kwiet?  
Heurd' ie doe' de auto keerden  
dan zien klaeg'lik blaffen niet?

Vremde baos, kuj' now wel slaopen,  
hej' gien hatt'zeer van jow daod?  
Daenk ie nog wel es an Robbie,  
waor hi'j is, hoe 't mit him gaot?

't Gaot him goed, mar d'r bin naachten,  
dat hi'j goelt, is hi'j van slag.  
Vremde baos, zol hi'j dan dromen  
van die malle zoemerdag?

*Johan Veenstra*

## Kiendergebed

Fikkien, weej' nog van van 't zoemer.  
dat we speulden naost oons huus.  
Dat we deur de lanen zwurven,  
hielendal tot an de sluus.

En aj' niet meer lopen kunnen,  
dreug ik je de kaampe rond.  
'k Vule nog je natte snutien,  
mal klein kroete van een hond.

Waaromm' waj' zo onveurzichtig,  
zag ie dan die auto niet?  
Waj' mar op de gröshoek bleven,  
now bin 'k je veur altied kwiet.

'k Wol zo graeg es mit je praoten,  
mar de hemel is zo veer.  
Achter de wolken kan 'k niet kommen,  
Pas ie goed op Fikkien, Heer?

*Johan Veenstra*



## Wilde gaanzen

In een v-vorm vliegen staotig  
wilde gaanzen deur de locht.  
Kommend uut et hoge noorden,  
veur de koolde op de vlocht.

Hasems heuren ze een stemme:  
'Grauwe voegels maek jim klaor.  
Gao de locht in, vlieg naor 't zuden,'  
en ze doen et ieder jaor.

Winters bin ze hier te gaaste,  
uut van huus op sobbig laand.  
En misschien is 't wel wat vreemd,  
mar d'r gruuut een zekere baand.

 De winter gaot, de meitied komt,  
de stemme dot zien wark opni'j.  
Ze slaon heur briede vleugels uut  
en soezen hoge over mi'j.

Wat spietig zie 'k ze dan weer gaon,  
't ofscheid vaalt mi'j muuilik, zwaor.  
'k Stik de hand op en ik zwaai,  
't beste heur, tot toekem jaor.

Johan Veenstra



## Stiekelvarkentien

'k Bin een stiekelig bruun besien  
uut de grote dierebos.  
'k Scharrel onder ekkelbomen,  
tussen 't blad en op et mos.  
En daor snuffel ik naor pieren  
of een slange of een moes.  
Want die lus ik hiel wat liever  
as jim slaod of boeremoes.

'k Bin eers wel een oolde slaopkop,  
winters drome ik altied.  
Bi'j de meitied wo'k pas wakker,  
deur de voegelties heur lied.  
'k Kiek wat soez'rig om mi'j henne  
en ik rekke mi'j es uut.  
En dan sliepe ik de stiekels  
puntig scharp op mien huud.

'k Kan et altied hiel goed vienen  
mit de beesten in de bos.  
Mit de iekhoorns en de knienen  
en mien buurman Reint de Vos.  
As ze toch gremietig wodden,  
Rule ik mi'j hadde op.  
en dan stikken heur mien stiekels  
Alderheiselikst in de kop!

...Now wet zeker iederiene  
staorigan al wie a'k bin?  
Juust, ik bin een stiekelvarken,  
'k Heb et hiel best naor mien zin!

Johan Veenstra